

每週經課朗誦經文(巴克禮台語漢字)2012/12/16

共同經課 - 1 西番雅書三章十四節~二十節

14 錫安的百姓啊，應該著唱歌！以色列啊，著歡喜來叫！耶路撒冷的百姓啊，著滿心歡喜快樂！15 耶和華已經除去你的罪案，趕出你的對敵。以色列的王——耶和華佇你中間，你免閣驚災禍。16 當彼日，欲給耶路撒冷講：莫得驚！錫安啊！你的手毋通垂落去！17 你的上帝——耶和華佇你的中間，就是全能者、拯救者。伊欲為著歡喜你來快樂，伊欲因為疼你來靜靜，閣為著歡喜你來唱歌。18 因為欣慕節期來憂悶者，我欲聚集in，in是屬你者、in擔當凌辱親像擔重擔。19 看啊，當彼時，我欲辦許個苦楚你者，欲拯救跛腳者，欲聚集受趕逐者。許個佇全地受凌辱者，我欲互in得著謳啫、名聲。20 彼時，我欲互恁來，彼時我欲聚集恁；因為我互恁受掠的人佇恁的目前倒轉來的時，就欲互恁佇地上萬百姓的中間，得著名聲、謳啫。這是耶和華講的。

共同經課 - 2 以賽亞書十二章二節~六節

2 看啊！上帝是拯救我者；我欲倚靠伊，亦無驚。因為主耶和華是我的氣力，是我的詩歌，伊亦成做救我者。3 恁欲對救恩的水泉歡喜來汲水。4 佇彼日，恁欲講：著感謝耶和華，求叫伊的名；將伊所行的報揚佇列邦中，講起伊的名已經受尊做高。5 恁著唱歌謳啫耶和華，因為伊所行的真顯赫；願此個代誌遍傳佇天下。6 錫安倚起的百姓啊，恁著出大歡喜的聲，因為以色列的聖者佇恁的中間做大。

共同經課 - 3 腓立比書四章四節~七節

4 著常常惦佇主來歡喜。我欲閣講伊，著歡喜。5 恁的純良著對眾人顯明。主近了。6 一概莫得掛慮，獨獨萬事著用祈禱、懇求，及感謝，將恁所求的排列佇上帝。7 就上帝的平安、搬(pôaⁿ)過一切人所想會到的，欲佇基督耶穌保守恁的心恁的念頭。

共同經課 - 4 路加福音三章七節~十八節

7 多多人出來欲受約翰的洗禮，伊就對in講：「毒蛇的類啊！是誰仔指示恁閃避將來的受氣啊？8 所以恁著結彼號合佇反悔的果子。莫得家己拍算：『有亞伯拉罕做阮的父。』因為我給恁講，上帝會對諸個石頭，出子孫互亞伯拉罕。9 今斧頭已經下佇樹頭，見若樹無結好果子的就剝伊，穴落火。」10 眾人問伊講：「按呢，阮著怎樣做？」11 伊應講：「有二領衫的，著分互無的；有物通食的，也著按呢。」12 抽餉的也來欲受洗禮，對伊講：「先生啊，阮著怎樣做？」13 伊對in講：「定著的餉以外，莫得加提。」14 兵丁也問伊講：「也阮著怎樣做？」伊對in講：「莫得勒索人，莫得彎人，著掠恁所得著的糧做夠額。」15 百姓啲向望的時，眾人心內啲議論約翰豈採是基督。16 約翰應眾人講：「我用水給恁行洗禮，獨獨有一個比我卡有權能的欲來，就若解伊的鞋帶我也袂堪得。伊欲用聖神及火給恁洗。17 伊的手提簸箕，欲將伊彼場一盡簸，收麥入伊的倉，若是麥香就用袂熄的火燒伊。」18 約翰另外用多多項項苦勸，來傳福音互百姓。